

Co muventan els en l'avegnir la politica svizra?

Las intervenziuns dals trais candidats tradeschan preferentschas

DA CLAUDIA CADRUVI / ANR

■ **L'avrigl elegian trais partidas in nov parsura. Petra Gössi candidescha per il presidi da la pld, Albert Rösti per la pps e Gerhard Pfister per la pcd. Co influenzeschan els l'avegnir da la Svizra? Lur intervenziuns tradeschan blier.** Concorrenza n'han els nagina. En tuttas trais partidas èn scadids ils termins d'annunziar candidaturas. Igl è da quintar che Gössi, Rösti e Pfister stattan ils proxims onns a la testa da las grondas partidas burgaisas. Sin quest post possedan els influenza considerabla: Els explitgeschan di per di la tenuta da lur partida en las medias ed els han la pussaivladad da tschentar agens accents u lantschar novas tematicas. Per savair en tge direziun che quai pudess ir ha l'anr examinà tge intervenziuns ch'els trais candidats han fatg ils ultims onns en il cussegl nazional.

Gössi – proprietaris e chantuns ritgs

Ils possessurs-chasa stattan a cor a *Petra Gössi* e medemamain ils chantuns bainstants. La cussegliera naziunala da Sviz ha inoltrà duas intervenziuns appartegnent la gulivaziun da finanzas: Ella pretenda dad adattar las disposiziuns per ch'els chantuns bainstants na stoppian betg pli pajar tant e crititgescha ch'els chantuns retschaviders survegnan damenia.

A favur dals proprietaris-chasa giavischia Gössi ch'ins stritgia la valor da l'atgna locaziun, pia l'uschenumnà *Eigenmietwert*, e ch'ins lubeschia deducziuns cumplainas dals tschains ipotecars. Plinavant less ella che cumpraders da chasas u abitaziuns stoppian vegnir protegids meglier en cas che l'immobiglia acquistada ha mendas.

En autras intervenziuns crititgescha Gössi che la confederaziun haja memia blers pledaders da medias e pretenda d'introducir in frain da personal – analog al frain d'expensas – per l'administraziun federala. Scursanir less ella era las contribuziuns per tschertas organisaziuns da consumers.

Gössi (40 onns) abitescha a Küssnacht al Rigi, lavura sco giurista a Turitg nua ch'ella è partenaria da la chanzlia Baryon. Ella presidescha la pld da



Petra Gössi, Gerhard Pfister ed Albert Rösti vegnan ad esser ils trais novs parsuras da pld, pcd e pps.

Sviz e sesa en suprastanza da l'associaziun dals proprietaris-chasa.

Pfister – Eritreans ed expats

La glista d'intervenziuns da *Gerhard Pfister* è bravamain lunga. Sias tematicas preferidas pertutgan ils esters e dumondas da scolaziun u studi.

Oravant tut dumondas d'asil ftschentan il politicher da Zug che giavischia en in'intervenziun che asilants cun in dretg da dimora provisoric na dastgian betg pli visitar lur patria. En in'otra intervenziun pretenda el dal cussegl federal in rapport davart la situaziun en Eritrea – cun la finamira da mussar ch'ins po tarmetter enavos Eritreans che n'han betg retschavì asil. Pfister less cumbatter il maldiever da letgs cun dauzar la durada minimala d'ina letg cun in conjugal ester da trais sin tschintg onns.

Pertutgant expats, pia esters che lavuran en Svizra en posiziuns autas, demussa Pfister ina outra tenuta: En



in'interpellaziun crititgescha el ch'expats na dastgian betg pli trair giu da la taglia ils custs per las scolas privatas da lur uffants.

Pfister (53 onns) abitescha ad Oberägeri en il chantun Zug. Suenter la matura a Mustér ha el studegià germanistica e filosofia e terminà sia furmaziun cun in doctorat. Pfister ha lavurà sco magister per tudestg e filosofia. Sin sia pagina d'internet chattan ins sut «lectura» ses cudeschs preferids. Pfister ha presidià nov onns la pcd da Zug.

Rösti – energia ed Emmentaler

Las tematicas d'in politicher dependan adina era da la cumissiun ch'el occupa. En l'ultima legislatura è *Albert Rösti* stà en la cumissiun d'ambient ed energia. Sias intervenziuns sa ftschentan perquai oravant tut cun dumondas d'energia. L'avaina da l'agronom è dentant era da sentir: Rösti sa maschaida gugent en la politica agrara. Cura ch'il



pretsch da l'Emmentaler è crudà ha el per exempel pretendì da regular las quantitats da produziun dal chaschiel.

Pliras da sias intervenziuns sa ftschantan cun la vieuta d'energia. Anc avant che decider la nova strategia d'energia avess Rösti vulì suttametter al pievel la dumonda da princip sch'ins giavischia insumma questa vieuta. En ina da sias ultimas intervenziuns crititgescha el l'auzada da la taxa da CO2. Simpatias demussa el per la forza idraulica che duess obtegnair pli tgunsch novas concessiuns, ma era per la geotermia ch'ins duess examinar en ina profundità da 5–10 kilometers.

Rösti (48 onns) è creschì si en ina famiglia da purs a Kandersteg ed ha studegià e doctorà a la ETH a Turitg. El è president da vischnanca da Uetendorf e porscha en ses «Büro Dr. Rösti GmbH» cussegliaziuns per ils secturs d'energia, agronomia, planisaziun ed ambient.

FOTOS KEYSTONE